

# RAPORT MONITORIMI I SEKTORIT TË MJEDISIT NË KOMUNËN E DRENASIT - 2025





# RAPORT MONITORIMI I SEKTORIT TË MJEDISIT NË KOMUNËN E DRENASIT - 2025

Autor dhe botues: EC Ma Ndryshe

Rr. Fehmi Lladrovci Nr.67, Prizren,  
Rr. Xhemajl Mustafa 9/1 LL-4 Nr.7

[www.ecmandryshe.org](http://www.ecmandryshe.org)  
[info@ecmandryshe.org](mailto:info@ecmandryshe.org)

049 714 024

Maj, 2026

## **Përmbajtja:**

HYRJE.....	5
GJETJET E RAPORTIT.....	6
Skema institucionale për planifikimin dhe menaxhimin mjedisor.....	6
Statistikat Kryesore - 2025:.....	7
Korniza ligjore.....	7
Hartimi, harmonizimi dhe zbatimi i dokumenteve të planifikimit dhe menaxhimit të mjedisit, projekteve dhe masave për mbrojtjen e mjedisit.....	8
Mbikëqyrja inspektive dhe raportimi mjedisor.....	8
Menaxhimi i Mbeturinave .....	10
Krijimi, grumbullimi, menaxhimi i të dhënave dhe sistemit të menaxhimit të dhënave.....	12
Bashkëpunimi, koordinimi dhe pjesëmarrja publike .....	13
Licencimi dhe lejet mjedisore .....	13
PËRFUNDIME .....	15
REKOMANDIMET .....	16
Për EC:.....	17

## HYRJE

Metodologjia për monitorimin mjedisor në nivel komunal është hartuar si instrument profesional për vlerësimin sistematik të gjendjes së mjedisit dhe funksionimit të mekanizmave institucionalë në komunat e Kosovës. Dokumenti synon të krijojë një kornizë të standardizuar për mbledhjen, analizimin dhe raportimin e të dhënave mjedisore, duke siguruar krahasueshmëri dhe koherencë ndërmjet komunave.

Kjo metodologji mbështetet në të dhëna primare të siguruar përmes pyetësorëve të strukturuar të plotësuar nga institucionet komunale përgjegjëse për çështjet mjedisore për periudhën janar - dhjetor 2025, si dhe në të dhëna sekondare të nxjerra nga raporte zyrtare komunale, dokumente institucionale dhe burime të tjera relevante që kontribuojnë në plotësimin dhe verifikimin e analizës.

Metodologjia e ndjekur nga EC Ma Ndryshe për përpilimin e këtij raporti merr në konsideratë 12 ligje që adresojnë aspekte të ndryshme të mbrojtjes së mjedisit, si:

Ligji nr.03/L-025 për mbrojtjen e mjedisit

Ligji nr.03/L-233 për mbrojtjen e natyrës

Ligji nr.08/L-025 për mbrojtjen e ajrit nga ndotja

Ligji nr.08/L-137 për pyjet e Kosovës

Ligji nr.04/L-147 për ujërat e Kosovës

Ligji nr.04/L-060 për mbeturina dhe Ligji nr.08/L-071 për ndryshimin dhe plotësimin e tij

Ligji nr.06/L-035 për veprimtaritë hidrometeorologjike

Ligji nr.08/L-065 për produktet biocide

Ligji nr.02/L-53 për gjuetinë

Ligji nr.04/L-197 për kimikate

Ligji nr.04/L-174 për planifikimin hapësinor

Ligji nr.04/L-175 për inspektoratin e mjedisit, ujërave, natyrës, planifikimit hapësinor dhe ndërtimit.

Metodologjia bazohet në analizën e këtyre komponentëve kryesorë të menaxhimit mjedisor:

- Skema institucionale për planifikimin dhe menaxhimin mjedisor
- Korniza ligjore
- Dokumentet e planifikimit dhe menaxhimit mjedisor
- Mbikëqyrja inspektive dhe raportimi mjedisor
- Sistemet e monitorimit mjedisor
- Sistemet e menaxhimit të të dhënave mjedisore
- Bashkëpunimi dhe pjesëmarrja publike
- Licencimi dhe lejet mjedisore

Në këtë kuadër, analiza synon të trajtojë në mënyrë të strukturuar elementet kryesore që rrjedhin nga legjislacioni në fuqi dhe praktikat institucionale në nivel komunal.

Gjetjet e paraqitura në këtë dokument identifikojnë çështjet kryesore dhe sfidat aktuale në sektorin e mjedisit, duke reflektuar gjendjen reale në bazë të të dhënave të ofruara nga institucionet komunale. Këto gjetje evidentojnë nevojën për përmirësim të kapaciteteve institucionale, si dhe për forcimin e proceseve të planifikimit dhe menaxhimit mjedisor.

Në funksion të kësaj analize, në pjesën përfundimtare janë paraqitur rekomandime konkrete, të cilat synojnë përmirësimin e praktikave ekzistuese dhe avancimin e menaxhimit mjedisor në nivel komunal, drejt një qasjeje më të qëndrueshme dhe efektive në mbrojtjen e mjedisit dhe resurseve natyrore.

## GJETJET E RAPORTIT

### Skema institucionale për planifikimin dhe menaxhimin mjedisor

Në Komunën e Drenasit, organet institucionale për planifikimin dhe menaxhimin mjedisor janë të themeluara dhe funksionojnë në kuadër të Drejtorisë së Planifikimit Urban dhe Mbrojtjes së Mjedisit.

Kjo drejtori përfaqëson strukturën kryesore përgjegjëse për trajtimin e çështjeve mjedisore dhe disponon gjithsej 8 punonjës. Brenda saj funksionon Sektori për Mjedis, i cili ka një kapacitet të kufizuar njerëzor prej 1 punonjësi.

Në këtë sektor është i angazhuar një zyrtar për mbrojtje të mjedisit, i cili mbulon çështjet kryesore që lidhen me planifikimin dhe menaxhimin mjedisor në nivel komunal.

Organi komunal	Emri zyrtar	Fuqia punëtore
Drejtoria	Drejtoria e Planifikimit Urban dhe Mbrojtjes së Mjedisit	8
Sektori	Sektori për Mjedis	1
Zyrtar mjedisor	Zyrtare për Mbrojtje të Mjedisit	/

Tabela 1. Skema institucionale lokale për menaxhimin mjedisor

Sa i përket kapaciteteve njerëzore, numri i shërbyesve civil vlerësohet i mjaftueshëm për kryerjen e detyrave të përcaktuara me kornizën ligjore. Gjithashtu, stafi disponon profilet e nevojshme profesionale për realizimin e përgjegjësive në këtë fushë.

Në aspektin e përgatitjes profesionale, stafi vlerësohet në nivel të mirë (4 nga 5), duke reflektuar një bazë të qëndrueshme njohurish për trajtimin e çështjeve mjedisore.

Megjithatë, nuk janë organizuar trajnime për stafin, as për kornizën ligjore dhe as për çështje mjedisore, çka paraqet një element që mund të ndikojë në zhvillimin e mëtejshëm profesional.

Në ushtrimin e funksioneve të tij, departamenti shfrytëzon udhëzimet administrative në fuqi si bazë për menaxhimin e çështjeve mjedisore.

### **Statistikat Kryesore - 2025**

- Numri i zyrtarëve në sektorin mjedisor: 1
- Numri i trajnimeve për kornizën ligjore: nuk janë realizuar
- Numri i trajnimeve për çështje mjedisore: nuk janë realizuar
- Udhëzues profesional të përdorur: Udhëzimet Administrative në fuqi

Po ashtu në kuadër të strukturës institucionale të komunës, çështjet mjedisore trajtohen edhe nga Drejtoria e Inspektoratit, e cila është përgjegjëse për mbikëqyrjen e zbatimit të legjislacionit mjedisor në praktikë.

### **Korniza Ligjore**

Komuna e Drenasit në planifikimin dhe menaxhimin mjedisor mbështetet në Ligjin nr. 03/L-025 për Mbrojtjen e Mjedisit.

Korniza ligjore mjedisore vlerësohet si pjesërisht e konsoliduar, duke reflektuar ekzistencën e bazës ligjore, por edhe nevojën për përmirësime të mëtejme në zbatimin dhe funksionalizimin e saj.

Nuk janë identifikuar mangësi konkrete ligjore gjatë ushtrimit të përgjegjësive në nivel komunal.

Sa i përket njohurive të stafit lidhur me kornizën ligjore, ato vlerësohen në nivel mesatar (3 nga 5), çka tregon se ekziston një bazë njohurish, por që kërkon zhvillim dhe avancim të mëtejshëm.

## **Hartimi, harmonizimi dhe zbatimi i dokumenteve të planifikimit dhe menaxhimit të mjedisit, projekteve dhe masave për mbrojtjen e mjedisit**

Komuna e Drenasit ka hartuar dokumente të planifikimit dhe menaxhimit mjedisor që rrjedhin nga korniza ligjore në fuqi.

Dokumentet kryesore të identifikuara përfshijnë:

- Planin Lokal të Veprimit në Mjedis
- Strategjinë për Cilësinë e Ajrit

Strategjitë mjedisore lokale janë të harmonizuara me strategjitë e nivelit qendror, duke reflektuar një përputhshmëri ndërmjet planifikimit lokal dhe politikave mjedisore në nivel qendror.

Sa i përket zhvillimit të projekteve mjedisore, komuna ka realizuar aktivitete që lidhen me përmirësimin e hapësirave publike, konkretisht përmes projekteve të gjelbërimit.

Në aspektin e masave për mbrojtjen e mjedisit, këto realizohen përmes hartimit të planeve komunale, të cilat përfshijnë elemente të mbrojtjes dhe menaxhimit mjedisor.

Kjo qasje tregon se komponenti mjedisor është i integruar në dokumentet dhe aktivitetet e planifikimit komunal.

Sipas raportit, gjatë vitit 2025 janë realizuar projekte dhe aktivitete që lidhen me mirëmbajtjen dhe rregullimin e hapësirave publike, përfshirë gjelbërimin dhe ndërhyrjet urbane që kanë ndikim në përmirësimin e mjedisit në zonat e banuara (Burimi: Raporti i Kryetarit për vitin 2025)

## **Mbikëqyrja inspektive dhe raportimi mjedisor**

Inspektimi i zbatimit të kornizës ligjore për mbrojtjen e mjedisit realizohet në nivel komunal.

Sa i përket raportimit, hartohen raporte të inspektimit të zbatimit të kornizës ligjore, përfshirë raportin vjetor të zbatimit të planeve.

Gjithashtu, hartohen raporte të monitorimit të zbatimit të strategjive mjedisore, si:

- Raporti vjetor i zbatimit të Planit Lokal të Veprimit në Mjedis (PLVM)
- Raporti vjetor i zbatimit të Planit Lokal për Cilësinë e Ajrit (PLVCA)

Gjendja e deponive të mbeturinave monitorohet në mënyrë sistematike, duke treguar një nivel funksional të mbikëqyrjes në këtë aspekt.

Nga ana tjetër, nuk janë realizuar vlerësime të ndikimit të deponive ekzistuese në mjedis.

Po ashtu, nuk janë identifikuar raste të çrregullimeve mjedisore nga aktivitetet e personave fizikë apo juridikë, si dhe nuk janë raportuar raste të tejkalimit të eksploatimit të resurseve natyrore mbi kushtet e lejuara.

Gjatë kësaj periudhe, inspektori i mjedisit ka qenë i angazhuar në aktivitete që lidhen me mbrojtjen e mjedisit nga ndotja, përfshirë inspektimin rreth lumenjve, zonave rurale sipas kërkesave të qytetarëve, si dhe çështje që lidhen me menaxhimin e mbeturinave.

Janë realizuar inspektime lidhur me hedhjen e mbeturinave afër rrugëve, parqeve dhe vendeve tjera publike, largimin e mbeturinave inerte në deponi adekuate, si dhe identifikimin e deponive ilegale në territorin e komunës së Drenasit. Gjithashtu, janë trajtuar raste sipas kërkesave të qytetarëve që lidhen me kanalizimet, ujërat e zeza dhe plehrat, si dhe janë kryer inspektime për varrezat e makinave dhe mbeturinat e tjera të ngjashme.

Po ashtu, janë realizuar inspektime të gurthyesve dhe fabrikave të tjera që shkaktojnë ndotje në mjedis, sipas kërkesave.

Në kuadër të mbikëqyrjes inspektive në fushën e mjedisit dhe përdorimit të tokës, gjatë vitit 2025 janë realizuar aktivitete që lidhen me kontrollin e ndotjes, menaxhimin e mbeturinave, si dhe mbikëqyrjen e shfrytëzimit të tokës bujqësore, me fokus në parandalimin e ndërrimit të destinimit pa leje dhe mbrojtjen e saj nga ndërhyrjet e paligjshme.<sup>1</sup>

---

<sup>1</sup> Burimi: Raporti i Kryetarit për vitin 2025

Sa i përket aktiviteteve inspektive në fushën e mjedisit, janë realizuar gjithsej 66 inspektive, janë hartuar 40 procesverbale, si dhe janë shqiptuar 3 gjoba mandatore në vlerë prej 750 €.²

Ndërsa në kuadër të mbikëqyrjes së përdorimit të tokës bujqësore, janë realizuar gjithsej 63 inspektive, janë hartuar 54 procesverbale, si dhe janë shqiptuar 6 gjoba mandatore në vlerë prej 2,600 €.³

## Menaxhimi i mbeturinave

Menaxhimi i mbeturinave në Komunën e Drenasit paraqet një komponent të rëndësishëm të menaxhimit mjedisor, megjithatë zhvillimi i këtij sektori mbetet i kushtëzuar nga mungesa e të dhënave të detajuara në nivel komunal.

Në mungesë të të dhënave specifike komunale, vlerësimi i gjendjes së menaxhimit të mbeturinave mbështetet në të dhënat e raportuara për komunën e Gllogocit (Drenasit) në kuadër të raportit të Agjencisë për Mbrojtjen e Mjedisit të Kosovës.

Sipas të dhënave, numri i banorëve në Komunën e Drenasit ka qenë 58,531 në vitin 2023, ndërsa në vitin 2024 është raportuar 48,079 banorë të shërbyer me shërbime të menaxhimit të mbeturinave. Duhet theksuar se këto të dhëna nuk janë plotësisht të krahasueshme, pasi për vitin 2023 ato bazohen në regjistrimin e popullsisë sipas ASK-së (2011), ndërsa për vitin 2024 i referohen numrit të banorëve të përfshirë në shërbim, çka ndikon drejtpërdrejt në interpretimin e treguesve për banor.⁴

Në këtë kontekst, edhe të dhënat për sasinë e mbeturinave duhet të interpretohen me kujdes. Gjatë vitit 2023 janë grumbulluar gjithsej 10,685 ton mbeturina komunale, ndërsa në vitin 2024 kjo sasi ka rënë në 9,125 ton, duke reflektuar një ulje prej 1,560 ton.

---

² Po aty

³ Po aty

⁴ Raporti i AMMK për menaxhimin e mbeturinave komunale në Kosovë, publikuar në vitin 2025, linku:

<https://ammk->

[rks.net/assets/cms/uploads/files/ALB%20Raporti%20per%20gjendjen%20e%20mbeturinave%20ne%20Kosoves%202023-2024.pdf](https://ammk-rks.net/assets/cms/uploads/files/ALB%20Raporti%20per%20gjendjen%20e%20mbeturinave%20ne%20Kosoves%202023-2024.pdf)

Ndërkohë, gjenerimi i mbeturinave për banor ka qenë 220.86 kg/banor/vit në vitin 2023, ndërsa në vitin 2024 është rritur në 254.82 kg/banor/vit, që paraqet një rritje prej 33.96 kg/banor/vit.<sup>5</sup>

Treguesi	2023	2024	Ndryshimi
Numri i banorëve	58,531	48,079*	-10,452
Sasia e mbeturinave (ton/vit)	10,685	9,125	-1,560
Sasia e mbeturinave (kg/vit)	10,685,000	9,125,000	-1,560,000
Gjenerimi i mbeturinave (kg/banor/vit)	220.86	254.82	+33.96
Gjenerimi i mbeturinave (kg/banor/ditë)	0.61	0.70	+0.09
Shkalla e mbulimit me shërbim (%)	82.7%	74.5%	-8%

Tabela 2. Statistikat kryesore për menaxhimin e mbeturinave - Komuna e Drenasit (Glllogoc)

*Shënim: Të dhënat për vitin 2024 i referohen banorëve të shërbyer dhe jo popullsisë totale.*

Të dhënat tregojnë një zhvillim të përzier në menaxhimin e mbeturinave në Komunën e Drenasit. Nga njëra anë, është evidentuar një ulje e sasisë totale të mbeturinave të grumbulluara, ndërsa nga ana tjetër është shënuar rritje e gjenerimit të mbeturinave për banor.

Ky ndryshim lidhet edhe me dallimet në mënyrën e raportimit të të dhënave për popullsinë ndërmjet viteve, çka ndikon në krahasueshmërinë e treguesve për banor.

<sup>5</sup> Po aty

Megjithatë, mungesa e të dhënave të plota dhe e sistemeve të strukturuar të monitorimit në nivel komunal kufizon mundësinë për analizë më të thelluar dhe për planifikim të bazuar në evidencë.

### **Krijimi, grumbullimi, menaxhimi i të dhënave dhe sistemit të menaxhimit të dhënave**

Komuna e Drenasit nuk ka sistem të monitorimit të cilësisë së ajrit.

Nuk janë raportuar stacione funksionale të monitorimit dhe nuk realizohet mbikëqyrje sistematike e cilësisë së ajrit.

Sa i përket komponentëve të tjerë mjedisorë:

- Komuna nuk ka sistem të monitorimit të cilësisë së dheut
- Nuk realizohet mbikëqyrje sistematike e cilësisë së dheut
- Komuna nuk ka sistem të monitorimit të cilësisë së ujërave sipërfaqësore dhe nëntokësore
- Nuk realizohet mbikëqyrje sistematike e cilësisë së ujit

Në përgjithësi, nuk ekzistojnë sisteme të strukturuar për monitorimin e komponentëve kryesorë mjedisorë në nivel komunal.

Komuna e Drenasit nuk ka ndërtuar sistem të menaxhimit të të dhënave mjedisore.

Megjithatë, departamenti posedon kapacitetet e nevojshme për krijimin, grumbullimin dhe menaxhimin e të dhënave mjedisore.

Gjithashtu nga të dhënat e raportit të Kryetarit për vitin 2025 nuk evidentohet ekzistenca e stacioneve të monitorimit apo sistemeve të automatizuara për mbledhjen e të dhënave mjedisore, çka nënkupton se vlerësimi i gjendjes së mjedisit mbështetet kryesisht në të dhëna administrative dhe aktivitete inspektuese, dhe jo në monitorim të vazhdueshëm me indikatorë të matshëm.

## **Bashkëpunimi, koordinimi dhe pjesëmarrja publike**

Bashkëpunimi dhe koordinimi me nivelin qendror në hartimin e akteve ligjore dhe nënligjore vlerësohet në nivel të ulët (2 nga 5), pa shembuj konkretë të raportuar.

Sa i përket bashkëpunimit me nivelin qendror në hartimin e strategjive mjedisore, ai vlerësohet në nivel mesatar (3 nga 5), pa raste të specifikuar të bashkëpunimit.

Bashkëpunimi me organizatat joqeveritare vlerësohet në nivel të ulët (2 nga 5). Sipas të dhënave të siguruar, nuk janë raportuar raste konkrete të bashkëpunimit.

Në aspektin e pjesëmarrjes publike, komuna zhvillon procese të konsultimit publik gjatë hartimit të dokumenteve të planifikimit dhe menaxhimit mjedisor, në përputhje me kërkesat ligjore.

Këto procese përfshijnë:

- Pjesëmarrje publike gjatë hartimit të Planit Lokal të Veprimit në Mjedis (PLVM)
- Pjesëmarrje publike gjatë hartimit të Planit Lokal për Cilësinë e Ajrit (PLVCA)

Niveli i pjesëmarrjes publike në këto procese vlerësohet si mesatar (3 nga 5), duke reflektuar një përfshirje të kufizuar të publikut në proceset vendimmarrëse.

## **Licencimi dhe lejet mjedisore**

Komuna e Drenasit nuk posedon leje apo licenca të lëshuara nga Drejtoria e Planifikimit Urban dhe Mbrojtjes së Mjedisit.

Përbashkërisht, në nivel komunal lëshohen leje mjedisore komunale për objektet e kategorisë së dytë, në përputhje me udhëzimet administrative në fuqi.

Evidentohet se gjatë vitit 2025 janë hartuar gjithsej 27 vendime për Licencë Mjedisore Komunale (LMK), në kuadër të kompetencave të nivelit lokal për trajtimin e kërkesave për aktivitete që kanë ndikim në mjedis.<sup>6</sup>

---

<sup>6</sup> Burimi: Raporti i Kryetarit për vitin 2025

## **PËRFUNDIME**

Nga analiza e të dhënave rezulton se Komuna e Drenasit ka të vendosura strukturat bazë institucionale për planifikimin dhe menaxhimin mjedisor, si dhe ka hartuar dokumente kyçe strategjike, përfshirë Planin Lokal të Veprimit në Mjedis dhe Strategjinë për Cilësinë e Ajrit.

Kapacitetet njerëzore dhe teknike në nivel institucional janë të pranishme dhe vlerësohen të mjaftueshme për ushtrimin e funksioneve kryesore, ndërsa përgatitja profesionale e stafit vlerësohet në nivel të mirë.

Në aspektin e zbatimit, komuna realizon inspektime dhe harton raporte për zbatimin e planeve dhe strategjive mjedisore, si dhe monitoron në mënyrë sistematike gjendjen e deponive të mbeturinave.

Megjithatë, identifikohen disa kufizime në funksionimin e përgjithshëm të sektorit mjedisor. Nuk ekzistojnë sisteme të strukturuar për monitorimin e komponentëve kryesorë mjedisorë (ajri, dheu dhe uji), si dhe mungon një sistem i formalizuar për menaxhimin e të dhënave mjedisore.

Gjithashtu, bashkëpunimi me nivelin qendror dhe me organizatat joqeveritare vlerësohet i kufizuar, ndërsa pjesëmarrja publike, megjithëse e pranishme, mbetet në nivel mesatar.

Në përgjithësi, sektori mjedisor në Komunën e Drenasit paraqet një bazë funksionale të organizimit dhe planifikimit, me nevojë për avancim në drejtim të sistematizimit të të dhënave, zhvillimit të monitorimit mjedisor dhe forcimit të bashkëpunimit institucional.

## REKOMANDIME

- 1** Të zhvillohet dhe funksionalizohet një sistem i integruar për monitorimin e komponentëve kryesorë mjedisorë (ajri, dheu dhe uji), me qëllim sigurimin e të dhënave të vazhdueshme dhe të besueshme.
- 2** Të krijohet një sistem i strukturuar për menaxhimin e të dhënave mjedisore, duke shfrytëzuar kapacitetet ekzistuese teknike dhe njerëzore.
- 3** Të forcohet bashkëpunimi me institucionet e nivelit qendror në proceset e hartimit dhe zbatimit të politikave dhe strategjive mjedisore.
- 4** Të rritet bashkëpunimi me organizatat joqeveritare përmes përfshirjes më aktive në iniciativa dhe projekte mjedisore.
- 5** Të përmirësohen mekanizmat e pjesëmarrjes publike, duke nxitur përfshirje më të gjerë të qytetarëve në proceset e konsultimit dhe vendimmarrjes.
- 6** Të shqyrtohet mundësia për organizimin e trajnimeve për stafin në fushën e kornizës ligjore dhe çështjeve mjedisore, me qëllim zhvillimin e mëtejshëm profesional.

## **Për EC:**

EC Ma Ndryshe është organizatë me bazë në komunitet, e themeluar në vitin 2006, që angazhohet për zhvillim të qëndrueshëm me qasje gjithëpërfshirëse. Aktivizmi i EC-it synon një Kosovë ku qeverisja demokratike është pjesëmarrëse, transparente dhe llogaridhënëse, duke siguruar që institucionet, komunitetet dhe palët e interesit të punojnë së bashku drejt një zhvillimi të qëndrueshëm. Ky vizion promovon vendimmarrjen gjithëpërfshirëse, politika më të fuqishme dhe përfshirje më të madhe të publikut, duke siguruar që qëndrueshmëria të jetë pjesë përbërëse e qeverisjes si në nivel lokal, ashtu edhe në atë kombëtar. Përmes koordinimit më të mirë institucional, hartimit të politikave të bazuara në dëshmi dhe angazhimit qytetar, angazhimi i EC-it synon të kapërcejë hendekun mes komuniteteve dhe institucioneve, duke siguruar që qeverisja e mirë të sjellë ndryshime të prekshme dhe afatgjata.

## **Deklarata e vizionit**

“Fuqizimi i një Kosove elastike dhe gjithëpërfshirëse, ku komunitetet në mënyrë aktive formojnë institucione të qëndrueshme, të digjitalizuara dhe të ndërgjegjshme”.

## **Deklarata e misionit**

“EC Ma Ndryshe përkrah qeverisjen demokratike dhe zhvillimin e qëndrueshëm në Kosovë duke nxitur zhvillimin e qëndrueshëm socioekonomik, kulturor dhe të gjelbër përmes edukimit digjital, kujdestarisë mjedisore, mobilizimit të komuniteteve, avokimit për vendimmarrje publike me pjesëmarrje dhe kultivimit të partneriteteve strategjike”.

